

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haû sên-yúng bâng chyáng nuingón dang shit kyô kat lhê.

² Nga-nhung é Îwa Garai Gasang eq Yhumsing Yesuq Hkrisduq chyáng mâ é, jeju eq nuingón hkyô gi, nungmoq chyáng ru joq nyi sháng gaq ô!

Hkrisduq Mâ É, Woi-nyí Hkyô Shimân Jeju Pé

³ Mauhkung htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhung lé shimân byi sù, nga-nhung é Yhumsing Yesuq Hkrisduq é Yhângwa, Garai Gasang gi, hkungsô wó nyi sháng gaq.

⁴ Hkâsu mù gâ le, nga-nhung gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhung lé hkyin yu to bê nghut ri. ⁵ Hau htoq agó, Yhang, nga-nhung lé chyitdap é yanmai, Yhang myit nguì ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhung lé masat to bê nghut ri.

⁶ Haû mù, Yhang chyitdap é Sù* má, nga-nhung lé láí láí byi bê nghut é, hpungwup shingkang bo é

* **1:6** Yhang chyitdap é Sù gâ é gi, Yesuq lé tái nau é nghut lhê.

jeju chyunghuq lé, chôm hkya-on sháng. ⁷ Garai Gasâng é agùn agó é jeju yanmai, nga-nhúng mara hkyut byî é hui luí, Yhang Zô é sui đông mai, nga-nhúng gi, Yhang má hkyi yù hkyô wó yu é nghut lhê. ⁸ Jeju haû lé gi, hpaqchyî byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê. ⁹ Garai Gasang gi, Yhang myit ngui é eq rajung za, Hkrisduq đông mai kut rá matú hen to bê nghut é, Yhâng é zaú tô é hkyô lé, nga-nhúng lé shit bê nghut ri. ¹⁰ Sê gyo wuî é hkyô haû gi, lhoq dik rá ahkyíng jé jáng, mauhkûng htoq eq myigùng htoq mâ é lhungháng lé, Hkrisduq má rading ralhum za kut rá nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhúng gi, Yhâng é hpungwup shingkang lé hkya-on kungtôn sháng gaq ga, ¹² Garai Gasang gi, Yhang myit sôn tô é lhungháng lé ban kut mù, Yhâng ô nau é đông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri. ¹³ Hau htoq agó, nungmoq le, nungmoq é hkyi yù hkyo é gabú danglù gâ é tengmán mungdang lé wó gyo kô é hkûn, Hkrisduq eq sêng é bang dut bekô nghut ri. Nungmoq gi, Hkrisduq lé lumjíng bekô nghut é yanmai, haû gidiq byî tô é Chyoiyúng Woi-nyí dizik htûng tap byî é hui bekô nghut ri. ¹⁴ Garai Gasâng é hpungwup shingkang lé hkya-on rá matú, Yhang eq sêng é byu pé hkyi xe yù huí é hkyíng jé shoq, Chyoiyúng Woi-nyí haû gi, nga-nhúng é muizê lé hkyak wó yû rá nghu é masat nghut ri.

Poluq Kyûdung Byî É Hkyô

15 Haû mù luî, Yhumsîng Yesuq lé nungmoq lumjîng é hkyô eq sân-yúng bang lhungháng lé nungmoq chyitdap é hkyô lé, ngò wó gyô é yan-mai, 16 ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkya-ôn nyi lhê. 17 Nga-nhûng é Yhumsîng Yesuq Hkrisduq é Garai Gasang nghut é, hpungwup shingkang bò sù haû Íwa gi, Yhang lé nungmoq je sé râ matú, hpaqchyî byéng-yá wó byî é eq san za wó sé nhang é Woi-nyí, nungmoq lé byi sháng gaq nghû, ngò, Yhâng chyáng dúng nyi lhê. 18 Hau htoq agó, Yhang, nungmoq lé ji yu é myit myoqbyù hkyô, hkasû é nghut é lé le, Yhâng é hpungwup shingkang bo é muizè gi, sân-yúng bâng chyáng agùn agó joq nyi é hkyô lé le, Yhâng é kô dik é a-tsam mó gi, lumjîng bang nga-nhûng é matú nghut é lé le, 19 nungmoq wó sé râ matú, nungmoq é myit myoqji lhoq gyeng byî é hui sháng gaq nghû, ngò kyûdung byî nyi lhê. A-tsam mó haû gi, Garai Gasang, Hkrisduq lé shi é mai lhoq dui toq yû mù, 20 mauhkûng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam mó eq rajung za nghut ri. 21 Hkrisduq gi, uphkan é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhîng é myîng lhunghâng é htoq má le, je gyaú é sù nghut lhê. 22 Hau htoq agó, Garai Gasang gi, lhungháng lé Yhâng é hkyiwa ô má tô to luî, haû noqkuq hpûng é matú, Yhang lé, jung hkanmó é ushuq dut râ dông masat to bè nghut ri. 23 Noqkuq hpúng haû gi, Hkrisduq é gungdu nghut luî, hkyô hkanmó má jung hkanmó lhoq byîng

jup é Hkrisduq byíng nyi é nghut ri.

2

Hkrisduq Má Asak Dui É Hkyô

¹ Laí ló bê hkûn, nungmoq gi, tarâ lu laí é eq mara kut shut é hkyô pê é yanmai, shi tô é bang dut kô é nghut lâ. ² Haú hkûn, nungmoq gi, mingkan ngón hkyô pé má lhaq châng nyi kô é htoq agó, haú tarâ a cháng bâng é myit má ahkuí mú zúi nyi é sobyô nghut é, maulat lé up sú htâng châng nyi kô é bang nghut lâ. ³ Nga-nhúng banshoq bang le, yhangmoq su kut nyi laí lo é bang chyat nghut mù, yubak mara byíng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé dông za châng wú é bang nghut lâ. Haú mù, góbang eq rajung za, nga-nhúng gi, Garai Gasâng é nhikmo-yo hkyô eq gíngdán wú é bang chyat nghut lâ. ⁴ Nghut kôlhang, shogyo nhikmyin myit gyaí bo é Garai Gasang gi, nga-nhúng, tarâ lu lai lui shi byuq bê bang dut kôlhang, Yhâng é chyitdap myit mó èq, nga-nhúng lé chyitdap lui, Hkrisduq eq rahá asak duì nhâng bê nghut ri. ⁵ Haú mù, nungmoq gi, Garaí jejú èq za hkyi yu é hui bekô nghut ri. ⁶ Garaí Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung tái é Yhâng é jeju lé, htang pyat má wó shit sháng gaq ga, ⁷ nga-nhúng lé, Hkrisduq eq rahá lhoq dui toq yú mù, mauhkûng htoq tsáng myhâng má, Yhang eq rahá zùng nhang to bê nghut ri. ⁸ Hkâsu mù gâ le, nungmoq gi, lumjíng é dông mai Garaí jejú èq za hkyi yu é hui bekô nghut ri. Haú gi, nungmoq

chýáng mâ é a nghut, Garai Gasâng jeju chyunghuq za ru nghut lhê. ⁹ Haû gi, yhumsing é muzó mai wó é a nghut é yanmai, ó yuq le nghutbun râ hkyô a joq. ¹⁰ Hkâsu mù gâ le, nga-nhúng gi, Garai Gasâng é loqmú pé nghut mù, nga-nhúng zui saí râ matú, hí hí mai, Garai Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haû mù luí, nungmoq gi, hí hkûn, hku lé lo é mai yhang tûngbaù pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. ¹² Haú u lé, nungmoq gi, Hkrisduq eq gâng lhùm tô é bang; Israelaq mingbyû a nghut é bang; danggidiq eq sêng é dangshikaq pé má gó ming byù nghut é bang; mingkan htoq má, myoqbyù jowò a joq é eq Garai a wó é bang nghut é lé, myitbun keq. ¹³ Nungmoq gi, hí hkûn wê gâng nyi é bang nghut kôlhang, ahkuí kúm, Hkrisduq é sui dông mai Hkrisduq Yesuq má shuí chyâng htep é hui bekô nghut ri.

¹⁴ Hkâsu mù gâ le, Yhânggùng yhang gi, nga-nhúng é nguingón hkyô nghut ri. Yhang gi, gyoro má kyo tô é madin nghut é a naù a wom hkyô lé hpyoq hpyi pyám byi luí, haû í myû* dut nyi é lé, rahú za dut nhâng bê nghut ri. ¹⁵ Haû hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htùm pyám bê nghut ri. Haû

* **2:14** I myû gâ é gi, Israelaq byu pé eq tûngbaù pé lé gâ lhê.

mù, Yhang ô nau é hkyô gi, haû í myû dut tô é lé, Yhânggùng má yhang, byû sik ra-myû za hpan to râ matú nghut ri; haú dông, simsaq hkyô kut byi bê nghut ri. ¹⁶ Yhang gi, a naù a wôm lhùm é hkyô lé, haú tapzîng má lhoq htûm pyám byi mù, haú tapzîng dông mai, byû myu í myu é lé ragùng za kut luí, Garai Gasang eq xoq byi bê nghut ri. ¹⁷ Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri. ¹⁸ Hkâsu mù gâ le, nga-nhúng í myû gi, Yhang dông mai, Woi-nyí ralhùm zâ èq, haú Íwâ chyâng wàng râ hkyô dong bê nghut ri.

¹⁹ Hau é yanmai, nungmoq gi, tûngbaù pé eq byû bíng pé a nghut lô é za, Garaí é byu pé eq rahá, mingbyû wuì eq yhumbyû wuì chyat nghut bekô nghut luí, ²⁰ haú lagyô pé eq myiqhtoí pé, hi tô é apûn awang htoq má xuq tô é bang chyat nghut akô; Hkrisduq Yesuq yhang, haú mâ é ahkyak é htungchyûn luqgok dut bê nghut ri. ²¹ Yhang má, wahpang lhum gón xoq lhùm bùm é nghut mù, haú Yhumsîng má chyoiyúng noqkuq yhùm ralhùm dut lò bê nghut ri. ²² Woi-nyí dông mai, Garai Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

3

Poluq, Tûngbaù Pé É Tarâ Hkô Sará

† 2:17 Wê gâng nyi é bang gâ é gi, tûngbaù pé lé gâ lhê. ‡ 2:17 Chyâng htep nyi é bang gâ é gi, Israelaq byu pé lé gâ lhê.

¹ Haû su nghut mù, Hkrisduq Yesuq é hkyô lé, nungmoq tungbaù pê chyáng hko kyô é yanmai, htongbyû dut sù, ngò Poluq gi, nungmoq é matú kyûdung byî lhê.

² Nungmoq lé dojaú râ é matú, ngo lé byî tô é Garai Gasâng jeju ayá shî lé, nungmoq gè gè wó gyô wú bekô râ nghut lhê. ³ Haû gi, hí hkûn, ngò, tot é dông kê tô wú bê eq rajung za, haû zaú tô é hkyô lé, shing-rán dông ngo lé sé nhang é nghut ri. ⁴ Haú hkyô lé, nungmoq nghap wú é hkûn, Hkrisduq eq sêng é zaú tô é hkyô, ngò rago sê é lé, nungmoq wó sé kó râ nghut lhê. ⁵ Haû lé, laî lò bê ipyat pé mâ é byu pé lé a sé nhang é nghut kôlhang, ahkuí gi, Garai Gasâng é chyoiyúng é, lagyô pé eq myiqhtoî pé lé, haû Woi-nyí èq hpông shit bê nghut ri. ⁶ Zaú tô é hkyô haû gi, gabú danglù dông mai, Hkrisduq Yesuq má, Israelaq byu pé eq rahá, tungbaù pé le, hkûng xoq bang wó dut luí, gungdu ralhûm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

⁷ Yhâng é hpungwup a-tsam mai, ngo lé byî tô é Garai Gasâng jeju chyunghuq é yanmai, ngò gi, gabú danglù shî taí râ dui-nhâng zoshâng dut é nghut lhê. ⁸ Ngò gi, haû Garai Gasâng é byu pé mâ é tiq dik sù htoq má lhang je tiq sù nghut kôlhang, haû Hkrisduq é a ung htoq taí é wó sùt hkyô lé, tungbaù pê chyáng hko kyo râ matú le, ⁹ haû lhunglhang lé hpan é Garai Gasang má, laî lò bê ipyat pé má zaú tô é, zaú tô é hkyô haû lé hkâsu kut tô é lé, yuq hkangmó lé taí sân kyo râ matú le, jeju shî, ngo lé byi bê nghut ri. ¹⁰ Haû gi, nga-

nhûng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, ¹¹ haû Garai Gasâng é hpaqchyî mó góng lé, noqkuq hpúng đông mauhkûng htoq tsáng myhâng mâ é uphkâng bang eq ahkáng ayá wó bang lé, ahkuî sé nhâng râ matú nghut lhê. ¹² Nga-nhúng gi, nga-nhûng é Yhumsîng Hkrisduq Yesuq eq rading ralhum za nghut é yanmai le, Yhang lé lumjîng é yanmai le, Garai Gasang chyáng, wám é myit eq a gyuq a wám é myit èq wó htep ê é nghut lhê. ¹³ Haû mù luî, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myit hkâgyui kó; haû gi, nungmoq é matú akyû bò rá hkyô nghut lhê.

Ehpesu Myuq Byu Pé Lé Kyûdung Byî É Hkyô

¹⁴ Haû pê é yanmai, ngò gi, haû Îwâ é hí má hkyihput htuq luî kyûdung é nghut lhê. ¹⁵ Mauhkûng eq myigùng htoq mâ é Yhâng é ikun byù lhunglhang gi, Yhâng chyáng mai myìng wó yu é chyat nghut lhê. ¹⁶ Nungmoq é lumjîng myit mai, nungmoq é i-myit unghkaû má Hkrisduq wó nyi nyi sháng gaq nghû, ¹⁷ Yhang é hpungwup shìngkang bo é agùn agó wó sùt é mai, nungmoq é i-myit unghkaû mâ é sù lé, Yhâng é Woi-nyí đông, hpungwup a-tsâm èq wum-o lhoq kîng byi râ matú, ngò kyûdung byi lhê. Hau htoq agó, nungmoq gi, chyitdap myit má amyit chîn to luî, awang hi to mù, ¹⁸ sân-yúng bang eq rahá, hau é apyî, a-tsùng, myhâng, nik, hkâ-í nghut é lé, rago wó sé kôluî, ¹⁹ Garai Gasâng é gumjup é hkyô lhunglhang èq wó lhoq gumjup yù kó sháng gaq nghû, sê é nyan htoq

má gyaú é Hkrisduq é chytidap hkyô lé, nungmoq wó sé râ matú, ngò kyûdung byi lhê.

²⁰ Ahkuî, nga-nhûng é hkaû má mû zuî nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhunglhâng htoq je wó kut byí é Su chyáng, ²¹ haû noqkuq hpûng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shingkang rû bo nyi sháng gaq ô! Amen.

4

Hkrisduq É Gungdu Má Rading Ralhum Za

¹ Haû mù luî, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghû, haû Yhumsing é yanmai, htóng lúng sù ngò Poluq gi, nungmoq lé lhoq pun lhoq kyîng kat lhê. ² Hkyô hkat hkangmó má i-myt lhoq nyhum é eq i-myt nú-nhâm nyi keq; myit hing é eq chytidap myit mai rayuq eq rayuq hkam jân lhûm nyi keq. ³ Haû Woi-nyí èq byí é myit hui hkyô lé, nguingón hkyô dông mai châng nyi râ matú, wó dut é í shikut nyi keq. ⁴ Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri. ⁵ Yhumsing rayuq za, lumjîng hkyô rahkat za, baptisma ralhum za nghut nyi ri. ⁶ Banshoq bâng é Íwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luî, lhunglhâng dông mai mû kut é eq lhunglhâng é ahkaû má lúng nyi sù nghut ri.

⁷ Nghut kôlhang, nga-nhúng yuq hkanmó gi, jeju chyunghuq lé, Hkrisduq mai ké byî é đông wó yu é nghut lhê. ⁸ Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuî chùng mù, byu pé lé gi, chyunghuq tsing gàm byî ri." ✧

ga, Chyúmdang má tâi tô é nghut lhê. ⁹ Haû "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naû é a nghut lhi? ¹⁰ Haû gyó lé é Sû gi, junghkang jungmó lé lhoq byíng jup râ matú, mauhkûng banshoq é ahtoq má doq ló é Sû yhang nghut lhê. ¹¹ Yhang gi, ra-am lé, lagyô pé, ra-am lé, myiqhtoî pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing byî to bê nghut ri. ¹² Haû bang gi, Garai Gasâng é byu pé lé wùn waq âng é muzó pé é matú, hen lajâng é bang nghut ri. Haû hkûn sheq, Hkrisduq é gungdu gi, ¹³ haû lumjíng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhum za wó dut mù, kô ðing bang dut lui, Hkrisduq é gumjup é isâm banshoq lé wó yu é hkûn jé shoq, wó kô jat nyi râ nghut lhê.

¹⁴ Haû mù, nga-nhúng gi, wuibaù pé èq hí shut htâng shut bat myhû é su dut é eq, byu pé é agè ashop é eq haq dâ é mhoq hpyoq hpaqchyî pé eq mhoqshit hkyô laidun hkanmó eq, shí shut hé shut mut tâng é su dut é lé hui zô é zoshâng wui su a nghut lô é za, ¹⁵ chyitdap myit mai tengmán é dang lé tâi nyi jáng, Hkrisduq nghu é ulhum má hkyô hkanmó kô myhang lò râ nghut lhê.

✧ 4:8 Hkya-on 68:18

16 Yhang đông mai, gungdu gón gi, ralhum eq ralhum htuqbang é gungsho showui showang pé lé xoq byî to bê nghut mù, gungsho showui showang haú pé gi, yhumsing é muzó lé zui saí nyi é nghut jáng, gungdu haú gi, chyitdap myit má, yhânggùng yhang kô lò myhang lò râ nghut lê.

Byù Sik Đông Asak Dui Râ Hkyô

17 Haú mù luí, haú Yhumsing é ahko ahkáng mai ngò nungmoq lé taí nau é hkyô gi, haú tũngbaù pé gi, akyû a bo é lé myit mù, asak dui kô é su, nungmoq gi, hkâkut kó. 18 Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byî é asak eq wê gâng byuq bekô nghut ri. 19 Yhangmoq gi, gyuq hoq hkyô a bo byuq lo kô é yanmai, myoqnoq myit đông a sansêng é hkyô jung hkangmó lé je wó kut xoq nyi shoq ga, yhumsing gùng lé, gungsho ô naù gadaú é hkyô má ap pyám bekô nghut ri.

20 Nungmoq kúm gi, Hkrisduq é hkyô lé haú đông mhoq yû kô é a nghut. 21 Nungmoq gi, Yesuq chyáng mã é tengmán hkyô đông, Yhâng é hkyô lé wó gyô wú é eq mhoq yu wú bekô nghut lê. 22 Haú mù, nungmoq gi, hí hpyang lê é nungmoq é nyi yap sâmlai nghut é, ô naù gadaú luí, yhumsing gùng yhumsing mhaú pyám é đông htên byoq ló nyi é nungmoq é byù xau lé tô pyám râ matú mhoq yû bê eq rajung za, 23 nungmoq é i-myit lé asik htaí pyám nhâng keq; 24 hau htoq agó, nungmoq gi, tengmán é eq sêng é dingmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Haû mù, nga-nhúng banshoq bang gi, gungdu ralhùm é gungsho showui showang pé chyat nghut é yanmai, nungmoq yuq hkangmó gi, mhaû é hkyô lé tô pyám luí, yhumsing é chyangnâm mâ é sù lé, tengmán é dang taí ra râ nghut lhê. ²⁶ "Nungmoq nhikjum yô é hkûn, mara hkâkut kó." ✧ nungmoq gi, buì wàng shoq nhikjum hkâyô nyì kó. ²⁷ Nat Tsadán lé le, jowò hkâbyi kó. ²⁸ Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyì luí, muzó zuí shikut ra râ nghut lhê.

²⁹ Nungmoq é nhut mai agè agaú é dang haí le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haú bang kô lam lò râ dang za taí keq. ³⁰ Haû hkyi yù râ buinyi é matú, dizik đông nungmoq lé tap to byì é Garai Gasâng é Chyoiyúng Woi-nyí lé hkâlhoq yón kó. ³¹ Haû myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé banshoq lé, nungmoq tô pyám keq. ³² Nungmoq gi, rayuq eq rayuq, ge é hkyô eq shogyo nhikmyin é hkyô tân shit lhum luí, Garai Gasang gi, Hkrisduq má, nungmoq lé mara hkyut byì é su, nungmoq yhangchang le mara hkyut byì lhùm nyì keq.

5

¹ Haû mù, nungmoq gi, chyitdap dik é zoshâng wuì nghut é yanmai, Garai Gasang lé alik yu é bang kut keq. ² Hkrisduq gi, Yhânggùng lé namngón jung hkungga eq shigu hkungga đông, nga-nhùng é matú Garai Gasâng chyáng Yhânggùng

✧ 4:26 Hkya-on 4:4

yhang ap byî pyám shoq, nga-nhúng lé chyitdap é su, nungmoq le chyitdap myit èq asak dui nyì keq.

³ Hau htoq agó, ashop é dông gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq taí lháng hkâtaí kó; hkâsu mù gâ le, nungmoq gi, Garai Gasâng é chyoiyúng byu pé nghut lhê. ⁴ Haû eq rajung za, a taí gíng é, ahoq ahî dang, dangsôm eq hkunchoq dông gyâ é dang pé lé a taí é za, jeju hkya-on dang za taí nyì keq. ⁵ Hkâsu mù gâ le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyì keq. ⁶ Ó yuq nghut kôle, dangsôm* dông mai nungmoq lé a wó mhaú kó sháng gaq; hkâsu mù gâ le, haû hkyô pé é yanmai, Garai Gasâng é nhikmo-yo hkyô gi, haû jìno a gyo bâng é ahoq má jé râ nghut lhê. ⁷ Haû mù luí, haû bâng chyáng hkâbo wang lòm kó.

⁸ Hkâsu mù gâ le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haû Yhumsîng má maubó pé nghut bekô nghut ri. ⁹ Haû Yhumsîng ô nau é hkyô haî nghut é lé ho htoq yû mù, maubó é yhangzô pé dông asak dui keq. ¹⁰ Hkâsu mù gâ le, haû maubó é ashî gi, ge é hkyô banshoq, dingmán é hkyô eq tengmán hkyô chyat nghut ri. ¹¹ Haû ashî a zuî é mauchut tuq muzó má a bo wang lom é za, yhangmoq é mara lé tûn shit keq. ¹² Hkâsu mù gâ le, haû jìno a gyo bang haq zaú kut é hkyô lé gi, taí htoq le lháng

* **5:6** Dangsôm gâ é gi, Garai Gasâng é nhikmo-yo hkyô a jé râ ga taí é dang nghut lhê.

hoq hpo nghut ri. ¹³ Nghut kôlhang, junghkang jungmó lé, haû maubó èq tân shit jáng gi, wó byu-myang é chyat dut râ nghut lhê. ¹⁴ Hkâsu mù gà le, junghkang jungmó lé byu-myàng nhang é gi, maubó nghut ri. Hau é yanmai,

"Yhup ngón nyî sù ê, toq aq, haû shi é mai dui toq aq hkoi; haû jáng, Hkrisduq gi, nang lé duqbó byi râ nghut lhê."†

ga luî taî tô é nghut lhê.

¹⁵ Haû mù luî, nungmoq hkâsu kut asak dui é hkyô má gyai sidiq nyî keq; hpaqchyî a bò bang su a nghut é za, hpaqchyî bò bang su kut nyî keq.

¹⁶ Buinyî ahkyíng shí pé gi, agè ashop é yanmai, wó é ahko ahkáng banshoq lé ge dik é dông chung jai keq. ¹⁷ Hau é yanmai, byù ngok pé a dut é za, haû Yhumsíng ô nau é hkyô gi, haî nghut é lé, sê gyô yu nyî keq. ¹⁸ Haû achaq achyut é yubak hkyô lhoq htoq é î lé hkâshuq wut kó; Woi-nyî lé kúm byíng nhang nyî keq. ¹⁹ Nungmoq gi, hkya-on kungtôn dang dông le, hkya-on mahkôn dang dông le, woi-nyî eq sêng é mahkôn dông le, rayuq eq rayuq dáng nyo lhum luî, nungmoq é i-myit unghkaû mai, haû Yhumsíng lé mahkôn hkôn mù, lhoq ngón nyî keq.

²⁰ Nga-nhûng é Yhumsíng Yesuq Hkrisduq é myíng lé lang luî, jung hkangmó é matú, haû Íwa Garai Gasang lé, hkâ-nhám le jeju hkya-ôn nyî keq.

²¹ Hkrisduq lé hkungga hpautap é myit èq, rayuq eq rayuq hpautap lhûm nyî keq.

Myi Eq Làng

† **5:14** Dang ngho shí gi, hí lhê é noqkuq hpûng pé taî gyó lo é dang nghut lhê.

²² Ikun myhî pé ê, haû Yhumsîng uphkanğ é dông châng é su, nungmoq é ikun hpô pé uphkanğ é dông châng nyi keq. ²³ Hkâsu mù gâ le, Hkrisduq gi, haû noqkuq hpúng é ulhum nghut é su, haû ikun hpô gi, ikun myhî é ulhum nghut nyi ri; Hkrisduq gi, haû Yhâng gungdu nghut é noqkuq hpúng lé hkyi yù Sû nghut ri. ²⁴ Haû noqkuq hpúng gi, Hkrisduq uphkanğ é dông châng é su, ikun myhî pé le, hkyô hkat hkangmó má, yhangmoq é ikun hpô pé uphkanğ é dông châng nyi râ lê.

²⁵ Ikun hpô pé ê, Hkrisduq gi, haû noqkuq hpúng lé chyitdap luî, hau é matú Yhânggùng lé Yhang ap pyâm é su, nungmoq é ikun myhî pé lé chyitdap nyi keq. ²⁶ Yhang haû su kut é gi, haû noqkuq hpúng lé, mungdang dông wui má châ pyâm luî, lhoq sân-yúng yù râ eq, ²⁷ haû noqkuq hpúng gi, agè agau é eq a-ká akông é hkyô haî le a bo é za, mara hûn râ hkyô a bo é eq chyoiyúng é, hpungwup shingkanğ bo é noqkuq hpúng dông, Yhânggùng lé wó ap byi râ matú nghut lê. ²⁸ Haû eq rajung za, ikun hpô pé gi, yhangmoq é ikun myhî pé lé, yhumsing gungdu lé su chyitdap râ dut lê. Yhumsing é ikun myhî lé chyitdap é sù gi, yhumsing gùng lé le, chyitdap é sù nghut bê. ²⁹ Ó yuq le, yhumsing gùng lé a chyitdap a kut é za, Hkrisduq gi, haû noqkuq hpúng lé kut byi nyi é su, yhumsing gùng lé byi tso byi huq luî, rago wú zúng nyi é nghut lê. ³⁰ Hkâsu mù gâ le, nga-nhúng gi, Yhâng é gungdû é gungsho showui showang pé chyat nghut lê. ³¹ Haû mù, "Hau é yanmai, yuqgè gi, înu îwa eq gang luî, yhangmyi eq zùm-yap mù, yhangnhik í yuq gi, gungsho ralhum za dut kó râ

nghut lâh. "☆ gâ tô ri. ³² Haú hkyô gi, gyai yhang zaú tô é hkyô nghut ri. Nghut kôlhang, ngò gi, haú Hkrisduq é hkyô eq noqkuq hpûng é hkyô lé taí nyi é nghut lâh. ³³ Haú mù, nungmoq yuq hkgangmó gi, yhumsing gùng lé chyitdap é su, yhumsing é ikun myhí lé le chyitdap râ dut lâh; haú ikun myhí le, yhang é ikun hpó lé hkungga râ dut lâh.

6

Zo Wuí Eq Mó Wui É Hkyô

¹ Zoshâng wui ê, haú Yhumsîng má, nungmoq é mó wui é jìno gyo keq; hkâsu mù gâ le, haú gi, kut gíng é hkyô nghut ri. ² "Náng é înu îwa lé hkungga aq. ³ Haú jáng, nàng, nyi ngón yuqyò mù, myidàm htoq má náng é asak chyungxe hîng nyi râ nghut lâh. "☆ gâ é dang gi, danggidiq lom é sâng-hî lhum hkunmó nghut ri.

⁴ Îwa pé ê, nungmoq é zo wui lé nhikjum a lhoq yô é za, haú Yhumsing é mhoq kyo hkyô eq mhoqshit lhoq pun hkyô dông yhangmoq lé baú kô nyi keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jìno gyô é su, gyuq hkunggâ é eq lhumzuí é myit mai, nungmoq é myidàm htoq mâ é junsing pé é jìno gyo keq. ⁶ Nungmoq gi, yhangmoq é hí má za, myoqdong ho é dông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myit unghkaú mai châng kut nyi keq. ⁷ Byù lé za dojaú é dông a nghut é za, haú Yhumsîng lé dojaú nyi é

dông le, shirông myit èq dojaú nyî keq. ⁸ Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyî é nghut jáng, haû Yhumsîng gi, yuq hkanmó lé shigyaú râ nghut é lé, nungmoq sê nyî lhê.

⁹ Junsîng pé ê, nungmoq le, nungmoq é jùn pé lé haû eq rajung za kut byî nyî keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsîng hpó gi, mauhkûng htoq má nyî é nghut luî, Yhang gi, myoqdong hkyin é hkyô a bo é sù nghut lhê.

Garai Gasâng É Gyè Hking

¹⁰ Ló htâng má, taí nau é hkyô gi, haû Yhumsîng eq Yhâng é hpungwup a-tsam mó má wum-o bo nyî keq. ¹¹ Haû nat Tsadán wá dâ é hpaqchyî pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq. ¹² Hkâsu mù gâ le, nga-nhúng gi, gungsho eq sui lé htúq htîng é bang a nghut é za, haû uphkâng bang, ahkáng ayá wó bang, mauchut tuq dut é mingkan shi é a-tsam pé eq mauhkûng htoq tsáng myhâng mâ é agè ashop é byò eq sêng é wum-o pé lé, htúq htîng é bang ru nghut lhê. ¹³ Haû mù luî, Garai Gasâng é gyè hking banshoq lé wut to keq; haû hkûn sheq, nungmoq gi, agè ashop hkyô jé é buinyî má, yhumsîng jowò má wó yap gîng to mù, hkyô hkat hkanmó lé ban kut jáng, wó yap ging tîng nyî kó râ nghut lhê. ¹⁴ Haû mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luî, ¹⁵ nungmoq é hkyî má gi, haû simsaq hkyô byî é gabú danglù hkô râ rì rì kut to mù, ging ging yap nyî keq. ¹⁶ Hau htoq agó, haû

agè ashop su é myiduq é myoshi lhunglhang lé wó sat ung pyám râ matú, lumjínghkyô nghu é golong lé chung to keq. ¹⁷ Hkyi yù hkyô shamtoq muq lé tsung to luí, Garai Gasâng é mungdang nghut é, haù Woi-nyí é shâm lé wun chûng keq. ¹⁸ Ahkyíng hkanmó má, kyûdung dang eq dúng tôngbán é dang ajung jûng eq, haù Woi-nyí má kyûdung nyí luí, machya nyí uchang, sân-yúng bang banshoq é matú, hkâ-nhám le, xoq xoq kyûdung byí nyí keq.

¹⁹ Haù gabú danglu é yanmai, shamtoq-tui hut huí é lagyo rayuq ngò nghut nyí kôlhang, haù gabú danglù nghut é zaú tô é hkyô lé, a gyuq a wàm wó taí kyo luí, ²⁰ ngò taí râ dut é lé, a gyuq a wàm wó taí sân kyo shoq, ngá nhut hpóng hkanmó, ngò taí râ mungdang pé lé byi sháng gaq, ngá é matú le, kyû bo dung byí nyí keq.

Shi-kyám Dang

²¹ Haù Yhumsing má, chyitdap é gumang eq lhumzuí é dui-nhâng zoshâng nghut sù, Tuhkiku gi, nungmoq lé jung hkanmó taí kyo râ nghut luí, ngò hkâsu nghut nyí é hkyô eq haí kut nyí é hkyô lé, nungmoq wó sé kó râ nghut lhê. ²² Ngamoq hkâsu nghut nyí é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luí, yhang lé, ngò, nungmoq chyáng nhang kat é nghut lhê.

²³ Íwa Garai Gasang eq Yhumsing Yesuq Hkrisduq chyáng mâ é lumjínghkyô má bo é chyitdap myit eq nguínghon hkyô gi, haù gumang wui chyáng ru joq nyí sháng gaq ô! ²⁴ A dat htûm é chyitdap myit mai, nga-nhûng é Yhumsing Yesuq Hkrisduq

lé chyitdap é lhunglhâng bang chyáng, Garaî jeju
gi, ru joq nyî sháng gaq ô!

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee